

IV GOVERNUN KONSTITUSIONAL SEKRETARIA ESTADU KONSELLU MINISTRU

Informasaun

Orsamentu Rektifikativu 2008 prevé Fundu Estabilizasaun Ekonómika:

ba Servisu Nesesidade Povunian

Díli, loron 2 fulan Jullu 2008

Proposta alterasaun Orsamentu Jeral Estadu nian ba 2008 – mós hili Orsamentu Rektifikativu – atu prevé kriaun Fundu Estabilizasaun Ekonómika, ho kapital ida mak millaun 240 USD no konsiste hanesan importante feramenta ne'ebé Governu AMP harí atu halo fase ba resesaun ekonómika ne'ebé mak sente iha nível mundial, liu-liu ba krize aihan no aumentu kustu ba aihan iha mundu tomak, nune'e mos kombate hahalok negativu tan aumentu presu kombustível no materiál konstrusaun sivil bele reflekte iha nível nasional.

Simeira Internasional foin lalais ne'e hala'o iha Roma, ne'ebé halibur país 180, hodi koalia kona-bá Situasaun Alimentar Global nain, resolve katak iha médiu prazu presu aihan sei mantém iha nível aktual. Ka bele mos, presu bens konsumu bele continua a'as nafatin, buat ne'e mak provoca impaktu negativu iha rai barak-barak, iha moris no iha saúde populasun nian.

Iha parte seluk, aumentu presu materiál konstrusaun ne'e mós preokupasaun boot, tanba bele atrasa ka impede planu dezvoltamentu Governu nian no la fo fiar ba investimentu iha parte sektor privadu.

Atu hamenus impaktu presu aihan no materiál konstrusaun iha ekonomia nasional no iha populasun Timor-Leste ne'e, Governu kria ona Fundu Estabilizasaun Ekonómika, ne'ebé iha objektivu prinsipál tolu:

- Asegura abastesimentu bens no seguransa aihan;
- Estabiliza presu, liu hosi intervensaun iha merkadu; no
- Asegura abastesimentu materiál konstrusaun sivil.

Nune'e, Governu bele husik abastesimentu merkadoria no produktu importante ho presu ne'ebé razoável no garante nafatin prosesu dezvoltamentu.

Governu iha situasaun ida ne'ebé la presiza hein apoiu urjénsia hosi parseiru dezvoltamentu sira bainhira populasun terus hela.

Governu AMP prepara ohin ba Futuru Nasaun nian no ho Orsamentu Rektifikativu, ne'ebé oras ne'e debate iha Parlamentu Nasional, jovem estudante timor oan atus ida

(100) sei bele kontinua sira nia estudu iha estranjeiru, liu hosi Programa Bolsa Estudo Internasional Timor-Leste, subsidiu hosi Governu.

IV Governu Konstitusional, liu hosi Ministériu Edukasaun, inisia tiha ona prosesu kandidatura, halo ona seleksaun ba jovem timor oan 100 ne'ebé sei aprofunda sira nia estudu iha estranjeiru, ba nível pós-graduasaun, Mestradu no Doutoramentu.

Alterasaun ne'e ba Orsamentu Jeral Estadu nian ba 2008 hodi aumenta kapasidade juventude timor oan sira nian, ne'ebé hatudu benefísiu boot ida, la'os deit ba juventude ne'e rasik, maibe, liu-liu, ba Povu Timor-Leste, nune'e bele iha liu tan razaun atu fiar no konfia iha Futuru Nasaun nian.

Maski ema hotu rekoñese difikuldade atu hakotu problema deslokadu internu nian, ne'ebé mosu iha krize 2006 no governu anterior la consegue rezolve, Governu AMP hakotu tiha ona problema hirak ne'e, mak hanesan, kampu deslokadu iha Hospital Guido Valadares, iha Jardim porto Díli nia oin no iha edifísiu antigu konsuladu Chinês, ne'ebé permiti atu fila ba sira nia uma hamutuk família rihun rua atus tolu (2.300)!

Kampu sira seluk mos neineik sei taka no Orsamentu Rektifikativu ne'e sei permiti atu polítika ne'e kontinua nafatin iha área ne'e hosi IV Governu Konstitusional, bele dehan katak benefísiu barak mak hetan iha saúde pública no moris diak família nian ne'ebé loron ida tenki husik sira nia uma.

Governu AMP eleje tinan 2008 hanesan Tinan Reforma, Estadu prepara ninia Instituisaun sira ba desafio ne'ebé País ne'e hasoru.

Alterasaun ne'e ba Orsamentu Jeral Estadu 2008 atende ba presiza povu nian no prepara ohin ba Futuru Nasaun nian.